



BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM

Broj:01-011-865/02.

Sarajevo, 01. avgusta 2002.

Z A P I S N I K

sa 30. sjednice Predstavničkog doma Parlamentarne skupštine
Bosne i Hercegovine, održane 01. avgusta 2002.godine

Trideseta sjednica počela je s radom u 11,15 sati. Prisustvovalo je 39 poslanika. Odsutvovali su Adem Borić, Zoran Spasojević i Ibrahim Đedović.

Pored poslanika sjednici su prisustvovali: član Predsjedništva Bosne i Hercegovine Jozo Križanović, predsjedavajući Vijeća ministara Dragan Mikerević, ministri Svetozar Mihajlović, Azra Hadžiahmetović i Zlatko Lagumdžija, kao i predstavnici međunarodnih organizacija u Bosni i Hercegovini.

Predsjedavajući Doma Mariofil Ljubić na početku je dao uvodne napomene u vezi sa sazivanjem 30. sjednice o prijedlogu dnevnog reda.

O prijedlogu dnevnog reda nije bilo diskusije. Sa 32 glasa ZA (koliko je u momentu glasanja bilo prisutnih poslanika) za 30. sjednicu usvojen je sljedeći

D N E V N I R E D:

1. Poslanička pitanja i odgovori,
2. Izvještaj Komisije Kolegija o nastojanju za postizanje saglasnosti o zahtjevu Vijeća ministara BiH za razmatranje Prijedloga zakona o osnovama Javnog radio-televizijskog sistema i o Javnom radio-televizijskom servisu Bosne i Hercegovine po hitnom postupku (član 105. Poslovnika),
3. Izvještaj Komisije Kolegija o nastojanju za postizanje saglasnosti o zahtjevu Vijeća ministara BiH za razmatranje Prijedloga zakona o Visokom sudskom i tužiteljskom vijeću Bosne i Hercegovine po hitnom postupku (član 105. Poslovnika),
4. Izvještaj Komisije Kolegija o nastojanju za postizanje saglasnosti o Prijedlogu zakona o vazduhoplovstvu Bosne i Hercegovine,
5. Izvještaj Komisije Kolegija o nastojanju za postizanje saglasnosti o zahtjevu Vijeća ministara BiH za razmatranje Prijedloga zakona o izmjenama i dopunama Zakona o carinskoj tarifi Bosne i Hercegovine, sa Carinskom tarifom, po hitnom postupku (član 105. Poslovnika),
6. Prijedlog zakona o veterinarstvu u Bosni i Hercegovini (drugo čitanje),
7. Prijedlog zakona o izmjenama i dopunama Zakona o Centralnoj banci Bosne i Hercegovine (drugo čitanje),

8. Prijedlog zakona o ravnopravnosti i jednakosti polova u Bosni i Hercegovini (drugo čitanje),
9. Prijedlog zakona o odlikovanjima Bosne i Hercegovine (drugo čitanje),
10. Prijedlog zakona o Agenciji za rad i zapošljavanje Bosne i Hercegovine (prvo čitanje),
11. Prijedlog zakona o upotrebi i zaštiti naziva Bosne i Hercegovine (prvo čitanje),
12. Prijedlog zakona o industrijskom vlasništvu u Bosni i Hercegovini (prvo čitanje),
13. Zahtjev za razmatranje Prijedloga zakona o tužilaštvu Bosne i Hercegovine po hitnom postupku (član 105. Poslovnika – predlagač poslanik Mariofil Ljubić),
14. Zahtjev za razmatranje Prijedloga zakona o registraciji pravnih lica osnovanih od institucija vlasti Bosne i Hercegovine, po hitnom postupku (član 105. Poslovnika – predlagač poslanik Mariovil Ljubić).

Ad. – 1: Poslanička pitanja i odgovori

Na 30. sjednici postavljena su pitanja kako slijedi:

Zdenko Vukić:

Pitanje Visokom predstavniku: Kada možemo očekivati donošenje Zakona o restituciji, odnosno što se može učiniti na ubrzanju ovog procesa?

Osman Brka:

U vezi s izgradnjom Begove kuće u Trebinju postavio je sljedeća pitanja:

- Da li je izdata dozvola za gradnju na lokalitetu Begove kuće u Trebinju?
- Ako nije zašto nadležni organi, ili inspekcije nisu spriječili nezakonitu gradnju?
- Koje će konkretne mjere protiv odgovornih institucija i pojedinaca preduzeti Predsjedništvo BiH i Komisija za zaštitu nacionalnih spomenika koju je ono osnovalo?
- Šta će preduzeti Ministarski vijeće po ovom pitanju da se ispoštuje zakon i Ustav ove države?

Sead Buturović:

Šta će Vijeće ministara, odnosno resorna ministarstva učiniti da riješe pitanje opstanka i funkcionisanja Zavoda za zbrinjavanje mentalno invalidnih lica Fojnica, Pazarić, Baković, Drin , Hum itd.?

Branislav Lolić:

- Od Vijeća ministara i svih nadležnih institucija zatražio da kažu kako misle riješiti problem na graničnim prelazima kako se ne bi stvarala prevelika gužva i predugo čekanje.
- Zatražio da se pokrene pitanje odgovornosti za povlačenje pripadnika Državne granične službe sa državne granice kod Kostajnice.

Abdurahman Malkić:

1. Od Vijeća ministara zatražio informaciju o toku realizacije Projekta CIPS-a, imajući u vidu pisanja štampe i afere vezane za ovaj projekat.
2. Zatražio informaciju o kršenju, odnosno zloupotrebi Odluke Visokog predstavnika o raspolaganju društvenim-državnim zemljištem, a koje se koristi u svrhe individualne i kolektivne izgradnje.

3. Zatražio informaciju o radu Regulatorne agencije za komunikacije i o dodjeli license za treći operater mobilne telefonije.
4. U vezi s nedavnom posjetom ministra spoljnih poslova BiH SAD-u, zatražio informaciju, odnosno postavio pitanje – Šta je rekao, odnosno kako je poručio predsjednik SAD ko treba da pobijedi u Bosni i Hercegovini na predstojećim izborima?

Boro Bjelobrk:

U vezi s ranije postavljenim pitanjima, a na koje nije dobio zadovoljavajuće odgovore, Kolegiju Doma uputio sljedeće zahtjeve:

- “Insistiram da mi obezbijede odgovore na pitanja povodom događaja u Banjoj Luci Trebinju;
- Insistiram da mi obezbijede odgovore o posjeti Moskvi;
- Insistiram da mi obezbijede odgovore na pitanje oko djevojke i momka Bosanca i Hercegovca čija diploma može biti nostrificirana u Evropi;
- Insistiram da mi se predstave ugovori o kupoprodajama oružja od '97. godine;
- Insistiram da mi se daju mjere i garancije za slobodno kretanje građana Srbije i Crne Gore povodom događaja na komemoraciji u Srebrenici”.

Muhamed Begović:

1. Kada će i hoće li Ministarski vijeće predložiti zakon kojim se u skladu sa Ustavom BiH i evropskim konvencijama regulišu pitanja naziva gradova i naseljenih mjesta?
2. Da li država BiH ima pravo na supstituciju nadležnosti u uslovima postojanja entiteta i u uslovima postojanja i djelovanja Dejtonskog sporazuma?
3. Po kojem se pravnom osnovu osporava regulisanje izdvajanja budžetskih sredstava na nivou države koja trebaju da služe u realizaciji odnosa vezano za tužbu BiH protiv Jugoslavije.

Senad Šarganović:

1. Zašto proizvođači meda, pčelari iz BiH ne mogu izvoziti med u zemlje EU?
2. Da li je DGS-u izdato uputstvo o bržem prolazu inostranih gostiju i turista koji idu u tranzitu kroz BiH prema moru?
3. U kojoj fazi je modernizacija i obnova Unske pruge obzirom da su sredstva od japanske vlade odobrena za taj projekat?

Mirko Baković:

Uputio zahtjev Vijeću ministara da pripremi zakonski prijedlog da se izvrši dekonfiskacija, denacionalizacija i dekontribucija oduzetih sredstava i imovine od 1945. godine pa na ovamo.

Sead Avdić:

Zatražio da Vijeće ministara provjeri koliko je autentična izjava premijera Srbije Zorana Đinđića izrečena u Strazburu – “Balkan opterećuju dva protektorata: Bosna i Hercegovina i Kosovo, čiji državno-pravni status definitivno još nije riješen”. Predložio da Vijeće ministara u tom kontekstu, na bazi autentične izjave gospodina Đinđića, objektivno sagleda stanje izjave, poduzme mjere i zauzme svoj stav.

U vezi s zahtjevom koje je Kolegiju uputio poslanik Boro Bjelobrk, predsjedavajući Mariofil Ljubić je rekao da ne može odgovoriti poslaniku Bjelobrku, pa je javno pozvao

predsjedavajućeg Vijeća ministara i Vijeće ministara da dostave informaciju kao odgovor na pitanje poslanika Bjelobrka. Istakao je da mu je nezvanično poznato da je Narodna skupština Republike Srpske raspravljala o događajima u Banjoj Luci i Trebinju po određenom materijalu, ali taj materijal nije dostavljen Domu, kao i da se pred Sudom u Banjoj Luci vode određeni krivični postupci.

Predsjedavajući Ljubić pozvao je Ministarstvo spoljnih poslova i Predsjedništvo BiH da konačno dostave informaciju o posjeti rukovodstva Republike Srpske u Moskvi.

U vezi s pitanjem vezanim za posjetu rukovodstva Republike Srpske Moskvi, kao i s pitanjem poslanika Malkića o posjeti Ministra spoljnih poslova Vašingtonu, govorio je Zlatko Lagumdžija, ministar spoljnih poslova.

Povodom diskusije Zlatka Lagumdžije govorili su Miloš Jovanović i Mirko Banjac.

Ad. – 2: Izvještaj Komisije Kolegija o nastojanju za postizanje saglasnosti o zahtjevu Vijeća ministara BiH za razmatranje Prijedloga zakona o osnovama Javnog radio-televizijskog sistema i o Javnom radio-televizijskom servisu Bosne i Hercegovine po hitnom postupku (član 105. Poslovnika)

Predsjedavajući Ljubić podsjetio je Dom da je Kolegij postigao saglasnost o zahtjevu Vijeća ministara, o čemu su poslanici dobili Izvještaj Komisije Kolegija, pa je na raspravu dao Prijedlog zakona.

U ime Kluba poslanika PDP-SNSD-SPRS-SNS Željko Bilbija, pored ostalog, rekao da će ovaj klub biti uzdržan prilikom glasanja o Zahtjevu Vijeća ministara, s obzirom da je Narodna skupština RS, kao i Vlada RS, raspravljala o ovom prijedlogu zakona i u načelu podržala njegovo donošenje, ali su sporne pojedine odredbe.

Mirko Banjac je u svojoj diskusiji, pored ostalog, rekao da se ponovo zloupotrebljava član 105. Poslovnika, te naglasio da je i ovog puta u pitanju zakon koji funkcioniše zbog čega nije visokog stepena hitnosti, a takođe nije ni niskog stepena složenosti. Pozvao je da se u redovnoj proceduri pokuša doći do zakona koji će biti prihvatljiv za sve.

Osman Brka je rekao da se nadao da će Dom do kraja ovog mandata imati barem jednu sjednicu na kojoj će Vijeće ministara, odnosno rukovodstvo Doma, odnosno Alijansa imati usaglašane stavove. Istakao je da u savremenoj demokratiji onaj ko ima parlamentarnu većinu, kad nešto stavlja na dnevni red, on to prpipemi da može da prođe, a Alijansa čitavo vrijeme radi da im prijedlozi ne prolaze, rekao je, pored ostalog, Osman Brka.

Na diskusije poslanika Bilbije replicirao je Damir Mašić.

Dalje su u diskusiji u okviru ove tačke dnevnog reda učestvovali Osman Brka, Mirko Banjac, Željko Bilbija i Dragi Stanimirović. Poslije diskusije predsjedavajući Vijeća ministara, u kratkom obraćanju Domu rekao je da je uslov da pređemo u drugu fazu odnosa sa Evropskom unijom to da ispunimo svih 18 smjernica Mape puta. Na 11. plenarnoj sjednici SITF, odnosno konsultativne grupe između Evropske unije i Bosne i Hercegovine, konstatovano je da nismo izvršili ovu jednu od smjernica i da nismo obezbijedili adekvatno funkcionisanje pojedinih institucija BiH koje na neki način treba da stabilizuju sistem Bosne i Hercegovine.

Poslije izlaganja predsjedavajućeg Vijeća ministara predsjedavajući Ljubić je dao pauzu radi konsultacija.

Nakon pauze predsjedavajući Kluba PDP-SNSD-SPRS-SNS Željko Bilbija obavijestio je Dom da je Klub, s obzirom na nove momente, zauzeo stav da podrži Prijedlog zakona, uzimajući u obzir njegovu važnost, kao i da je Dom naroda već zakon usvojio.

Predsjedavajući Ljubić dao je na glasanje Prijedlog zakona.

Od 36 prisutnih ZA je glasao 31, jedan je glasao protiv, a četiri poslanika su se suzdržala.

Predsjedavajući je konstatovao da je Predstavnički dom usvojio Prijedlog zakona o osnovama Javnog radio-televizijskog sistema i o Javnom radio-televizijskom servisu Bosne i Hercegovine.

Ad. – 3: Izvještaj Komisije Kolegija o nastojanju za postizanje saglasnosti o zahtjevu Vijeća ministara BiH za razmatranje Prijedloga zakona o Visokom sudskom i tužiteljskom vijeću Bosne i Hercegovine po hitnom postupku (član 105. Poslovnika)

U Komisiji Kolegija postignuta je saglasnost o Zahtjevu Vijeća ministara.

U okviru ove tačke nije bilo diskusije, pa je odmah izvršeno glasanje o Prijedlogu zakona.

Od 36 prisutnih ZA je glasalo 26, protiv 1, uzdržalo se 9 poslanika. Po entitetima, iz Federacije BiH ZA su glasala 23, iz Republike Srpske 3 poslanika.

Predsjedavajući je konstatovao da Prijedlog zakona nije dobio entitetsku većinu i da ide na usaglašavanje.

Ad. - 4: Izvještaj Komisije Kolegija o nastojanju za postizanje saglasnosti o Prijedlogu zakona o vazduhoplovstvu Bosne i Hercegovine

Predsjedavajući je konstatovao da je u Komisiji Kolegija postignuta saglasnost i da su se stekli uslovi da se Prijedlog zakona razmatra u drugom čitanju.

Za riječ se javio Mirko Banjac i upitao predsjedavajućeg da li je Kolegij postigao saglasnost o principima, na što je predsjedavajući Ljubić odgovorio da je Kolegij postigao saglasnost o Prijedlogu zakona u prvom čitanju.

U drugom čitanju o Prijedlogu zakona nije bilo diskusije, pa je izvršeno glasanje.

Od 37 prisutnih 27 poslanika glasalo je ZA, jedan je glasao protiv, 9 se uzdržalo. Po entitetima, iz Republike Srpske ZA su glasala 3, iz Federacije BiH 24 poslanika.

Predsjedavajući je konstatovao da Prijedlog zakona nije dobio entitetsku većinu i da slijedi postupak usaglašavanja.

Poslije glasanja za riječ se ponovo javio Mirko Banjac. Pored ostalog, rekao je da je malo prije postavio pitanje upravo zato što je znao kakav će biti ishod. “Prvo kažete da ste se usaglasili, a onda kažete da nema amandmana, a onda na kraju glasate protiv toga”, rekao je Mirko Banjac i naglasio da se ovo ne može nazvati ozbiljnim radom.

Ad. – 5: Izvještaj Komisije Kolegija o nastojanju za postizanje saglasnosti o zahtjevu Vijeća ministara BiH za razmatranje Prijedloga zakona o izmjenama i dopunama Zakona o carinskoj tarifi Bosne i Hercegovine, sa Carinskom tarifom, po hitnom postupku (član 105. Poslovnika)

Predsjedavajući je podsjetio poslanike da Kolegij nije postigao saglasnost, a potom je Zahtjev Vijeća ministara dao na glasanje u drugom krugu.

Od 37 prisutnih ZA je glasalo 25, protiv 1, 10 se uzdržalo. Po entitetima, iz Federacije BiH protiv su glasala 2, a iz Republike Srpske 4 poslanika. Prema tome Zahtjev Vijeća ministara je usvojen.

U raspravi o Prijedlogu zakona učestvovali su Branislav Lolić, Željko Bilbija, Senad Šarganović, Željko Mirjanić, Mirko Mijatović, Sead Avdić, Miro Grabovac i Dušan Stokić. U ime predlagača govorila je ministar Azra Hadžiahmetović .

Poslije diskusije, sa 30 glasova ZA i 5 uzdržanih, iz Federacije BiH ZA su glasala 23, iz Republike Srpske 6 – Dom je usvojio Prijedlog zakona o izmjenama i dopunama Zakona o carinskoj tarifi Bosne i Hercegovine, sa Carinskom tarifom.

Dom je uz usvajanje Zakona usvojio zaključak o tumačenju člana 8. Zakona.

Ad. – 6: Prijedlog zakona o veterinarstvu u Bosni i Hercegovini (drugo čitanje)

O Prijedlogu zakona nije bilo diskusije.

Dom je usvojio amandmane poslanika Saliha Kulenovića i Branislava Lolića, a potom je, sa 35 glasova ZA usvojen i Zakon o veterinarstvu u Bosni i Hercegovini.

Ad. – 7: Prijedlog zakona o izmjenama i dopunama Zakona o Centralnoj banci Bosne i Hercegovine (drugo čitanje)

Dom je bez diskusije usvojio Zakon o izmjenama i dopunama Zakona o Centralnoj banci Bosne i Hercegovine.

Ad – 8: Prijedlog zakona o ravnopravnosti i jednakosti polova u Bosni i Hercegovini (drugo čitanje)

Predsjedavajući Ljubić podsjetio je da su u plenarnoj fazi amandmane podnijeli poslanici Željko Bilbija i Emina Zaćiragić.

Violeta Kamberović zapitala je da li svi poslanici imaju pred sobom amandmane. Napomenula je da su amandmani na Komisiji odbijeni, a da primjećuje da će i neki poslanici koji su glasali protiv sada glasaju za. Ovim povodom predsjedavajući je pozvao da se amandmani pripreme kako ne bi bilo zabune, a da se do tada razmatraju naredne tačke.

U nastavku rada po ovoj tački Dom se prvo izjasnio o amandmanima Željka Bilbije od I do IX.

Amandmani I, II, i IX dobili su većinu prisutnih, ali ne i entitetsku većinu, pa će se o njima provesti postupak usaglašavanja.

Amandmani III, IV, V, VI, VII i VIII nisu dobili većinu prisutnih pa prema tome nisu usvojeni.

Takođe će se provesti postupak usaglašavanja o amandmanu poslanika Emine Zaćiragić, za koji je glasala većina prisutnih poslanika, ali nisu dobili entitetsku većinu.

Ad. – 9-12:

Bez diskusije, Predstavnički dom je usvojio:

- Prijedlog zakona o odlikovanjima Bosne i Hercegovine,
- Prijedlog zakona o Agenciji za rad i zapošljavanje Bosne i Hercegovine, u prvom čitanju,
- Prijedlog zakona o upotrebi i zaštiti naziva Bosne i Hercegovine u prvom čitanju i
- Prijedlog zakona o industrijskom vlasništvu u Bosni i Hercegovini u prvom čitanju.

Ad. – 13: Zahtjev za razmatranje Prijedloga zakona o tužilaštvu Bosne i Hercegovine, po hitnom postupku (član 105. Poslovnika – predlagač poslanik Mariofil Ljubić)

Zahtjev Vijeća ministara nije dobio entitetsku većinu, te slijedi postupak usaglašavanja. Od 34 prisutna ZA je glasalo 27, protiv 1. Pet poslanika se uzdržalo. Po entitetima, iz Federacije BiH ZA je glasalo 25, iz Republike Srpske 2 poslanika.

Ad. – 14: Zahtjev za razmatranje Prijedloga zakona o registraciji pravnih lica osnovanih od institucija vlasti Bosne i Hercegovine, po hitnom postupku (član 105. Poslovnika – predlagač poslanik Mariofil Ljubić)

Zahtjev Vijeća ministara da se Prijedlog zakona o registraciji pravnih lica osnovanih od institucija vlasti Bosne i Hercegovine razmatra po hitnom postupku nije dobio entitetsku većinu. Od 35 prisutnih, ZA je glasalo 25, protiv 1, uzdržalo se 7 poslanika. Po entitetima, iz Republike Srpske ZA su glasala 2, iz Federacije BiH 25. Prema tome, i o ovom zahtjevu provest će se postupak usaglašavanja u Komisiji Kolegija.

Ovim je realizovan dnevni red 30. sjednice.
Sjednica je s radom završila u 18 sati.

Sastavni dio ovog zapisnika je transkript 30. sjednice Predstavničkog doma.

S E K R E T A R
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
Mariofil Ljubić